

Dithero tsa Tirelano mo Kutlwanong

33/2015 Thero ka Sontaga wa 1 morago ga moletlo wa Borarobongwe, e le ka 07. 06. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, letsatsi le, le kwadilwe mo go Luka 10:16, le re: **"Yo o lo utlwanng, o utlwa nna; yo o lo nnyatsang, o nyatsa yo o nthomileng."**

1. Sefela sa 148 - 131/144

2. Thapelo: A bopelotlhomogi le kagiso e e tswang mo Modimong o e leng Rara wa rona yo o mo legodimong le mo Moreneng wa rona Jesu Keresete di nne le lona! Amen. Mongwa-thata-yotlhe o re abetse nakonyana e gore re kopane mono gore re tumise wena, Baba yo o rategang. Ke gona re go lebogang, re go kopa gore o tlhome tumelo ya rona ka letsatsi le letsatsi. O re femele mo thateng ya ga Satane, le mo bosuleng jotlhe jo bo lekanng go re kgaoganye le wena, Morena. O re fe botshelo jo bo sa khutleng ka ene Jesu Keresete, Morena wa rona. Amen.

3. Lefoko la Testamente e kgologolo le kwadilwe mo go Hes. 18:1-4. 21-24. 30-32;

Epistolo ka fa thulaganyong ya 2 e kwadilwe mo go 1 Johane 4:16b-21;

Efangele ka fa thulaganyong ya 3 e kwadilwe mo go Johane 5:39-47.

4. A go ipolelwe tumelo ya bokeresete!

5. Sefela sa 302 - 277/284

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Luka 16:19-31, e re: "Go ne go le motho mongwe yo o humileng, a apere seaparo se sehibidu le lesela le lentle la letseta, a nna a itumela ka letsatsi le letsatsi mo bontlengtleng. Mme mokopi mongwe yo o bidiwang Lasaro, o ne a beilwe fa kgorong ya gagwe, a tletse dintho. A eletsa go kgorisiwa ka tse di wang mo tafoleng ya mohumi. Gape ga tla dintšwa, tsa latswa dintho tsa gagwe. Ya re mokopi a swa, a belegelwa ke baengele kwa sehubeng sa ga Aborahame. Mohumi le ene a swa, a fitlwa. Ya re a le mo felong ga baswi, a tsholetsa matlho a le mo

ditlhokofatsong, a bona Aborahame kgakala le Lasaro a le mo sehubeng sa gagwe. Ke fa a kua a re: 'Rara Aborahame, nkutlwele botlhoko, o rome Lasaro gore a ine ntlha ya monwana wa gagwe mo metsing, a ntsidifatse loleme; gonne ke utlwa botlhoko mo kgabong e.' Mme Aborahame a re: 'Ngwanaka, gopola gore o amogetse tse di molemo tsa gago mo botshelong jwa gago, mme Lasaro ene tse di bosula jalo; mme jaanong mono ene o a gomodiwa, mme wena o a tlhokofadiwa. Mme kwa ntle ga tsotlhe tseo go na le kgophu e kgolo fa gare ga rona le lona, gore ba ba kwano ba ba ratang go fetela go lona, ba retelelwe, le ba ba koo ba ba ratang go tla kwano go rona, ba palelwe.' Mohumi a re: 'Rra, fa go le jalo, ke go rapela gore o mo rome kwa ntlong ya ga rre; gonne ke na le bomorwarre ba le batlhano; a ye teng, a ba tlhagise, e se re gongwe le bone ba tla felong fano ga tlhokofatso.' Aborahame a mo fetola a re; 'Ba na le Moše le baporofeti; a ba utlwe bone!' Mme mohumi a re: 'Nyaya, Aborahame rra, mme fa mongwe a tswa mo baswing, a ya kwa go bone, ba tla sokologa.' Foo Aborahame a mo raya a re: 'Fa ba sa utlwe Moše le baporofeti, ga ba ka ke ba kgonega, le fa mongwe a ka tsoga mo baswing.'" Amen.

8. Thero: Phuthego e e rategang mo Moreneng wa rona Jesu Keresete, lefoko la thero ya kajeno le bua ka ga banna ba le babedi. Go na le mongwe yo re utlwang ka ga gagwe gore "Go ne go le motho mongwe yo o humileng, a apere seaparo se sehibidu le lesela le lentle la letseta, a nna a itumela ka letsatsi le letsatsi mo bontlengtleng." Ka ga yo mongwe, e bong Lasaro re utlwa gore "mme mokopi mongwe yo o bidiwang Lasaro, o ne a beilwe fa kgorong ya gagwe, a tletse dintho. A eletsa go kgorisiwa ka tse di wang mo tafoleng ya mohumi. Gape ga tla dintšwa, tsa latswa dintho tsa gagwe." Ka bokhutshwane re ka re: Ka ba le babedi bao re ka bona ka fa batho ba tshelang ka teng mo lefatsheng ka dikemo tse di farologanyeng, le ka se se tshwanang, botlhe ba mo tseleng, foo ga go kgethwe fa gare ga difatlhego tsa batho, ka loso. Mohumi o ne a swa, le Lasaro. Dintšwa tsa mo utlwela botlhoko, tsa mo latsa dintho, ya re a sena go swa, a belegelwa ke baengele kwa sehubeng sa ga Aborahame. Tlhokomela gore mohumi le ene a swa, a fitlhwa.

Ya re ba sena go fitlhwa, ba ile go tshela kwa tlase ga moriti wa loso, mme ba ye mo mafelong a a farologanyeng, mohumanegi a iswa mo sehubeng sa Aborahame, mme mohumi mo felong ga baswi. Phuthego e e rategang, Lasaro a tshela mo o setse a tshela sentle, mme mohumi o setse a ile mo felong fa go botlhoko, o setse a latlhegetswe

bontlente jwa gagwe. Foo re utlwa gore mohumi o ne a rata go dirisa Lasaro jaaka morongwa, a tsholetsa matlho a le mo ditlhokofatsong, "a bona Aborahame kgakala le Lasaro a le mo sehubeng sa gagwe. a bona Aborahame kgakala le Lasaro a le mo sehubeng sa gagwe. Ke fa a kua a re: 'Rara Aborahame, nkutlwele botlhoko, o rome Lasaro gore a ine ntlha ya monwana wa gagwe mo metsing, a ntsidifatse loleme; gone ke utlwa botlhoko mo kgabong e.'" Mohumi a utlwa botlhoko jo bo maswe, loleme lwa gagwe la bolawa ke lenyora, re re: O ne a tlaselwa mo go maswe.

Le fa go ntse jalo, mohumi o ne a ise a latlhegelwe ke tsholofelo, a bona Aborahame le Lasaro ba le kgakala le ene, a solofela gore Lasaro o ka romelwa mo go ene, a sa bone "kgophu e kgolo e e neng e le fa gare ga bone." Le fa re ka mo kaya selatlhegi fela, Aborahame o mo gopotsa ka lebaka le a latlhwang ka ntlha ya lona, ka tse di diragetseng mo botshelong jwa bone mo lefatsheng. Gape a mmolelela, a re: "Ngwanaka, gopola gore o amogetse tse di molemo tsa gago mo botshelong jwa gago, mme Lasaro ene tse di bosula jalo; mme jaanong mono ene o a gomodiwa, mme wena o a tlhokofadiwa. Mme kwa ntle ga tsotlhe tseo go na le kgophu e kgolo fa gare ga rona le lona, gore ba ba kwano ba ba ratang go fetela go lona, ba retelelwe, le ba ba koo ba ba ratang go tla kwano go rona, ba palelwe." Go utlwala gore mohumi o nna mo felo foo mmogo le ba bangwe. Re bona le se sengwe, fa kopo ya gagwe e ne e sa amogelwe, go kwadilwe gore "Mohumi a re: 'Rra, fa go le jalo, ke go rapela gore o mo rome kwa ntlong ya ga rre; gone ke na le bomorwa-rre ba le batlhano; a ye teng, a ba tlhagise, e se re gongwe le bone ba tla felong fano ga tlhokofatso.'" Ke gore mohumi o kopela bomorwa-rraagwe gore ba se ka tla mo felong foo kwa go nang le phuranyo ya meno teng. Aborahame a mo fetola a re; 'Ba na le Moše le baporofeti; a ba utlwe bone!' Mme mohumi a re: 'Nyaya, Aborahame rra, mme fa mongwe a tswa mo baswing, a ya kwa go bone, ba tla sokologa.' Foo Aborahame a mo raya a re: 'Fa ba sa utlwe Moše le baporofeti, ga ba ka ke ba kgonega, le fa mongwe a ka tsoga mo baswing.'" Ke yona tsela ya go tla felo foo. Ga go tlhokege gore Lasaro a ye mo go bone go ba bolelela tse a di bonyeng, le go di utlwa koo. Ke nnete, fa batho "ba sa utlwe Moše le baporofeti, ga ba ka ke ba kgonega, le fa mongwe a ka tsoga mo baswing." Ga go kgonege gore ba tlabologe, ba tlabologe mo tumelong e e tla ba thibela go goroga mo felo ga molete wa molelo, fa ba sa utlwe tse di kwadilweng mo Beibeleng.

Phuthego e e rategang ke boleo jwa rona jo bo re kgaoganyang le Modimo. Ka moo re kaelwa, le go kopiwa ke lorato lwa Modimo gore re nne re ipolele maleo a rona, re se lape, re nne re kope go itshwarelwa, re dumele. Kana se re se senolelwang gore re baakanyeditswe boitshwarelo jwa maleo ke Jesu Keresete. Ka ene re na le boitshwarelo jwa maleo ka go dumela mo go ene. Lefoko le a re ruta gore re se ka ra silofadiwa ka go batla tsa bontlentele jwa lefatshe leno ka go lebala gore ka letsatsi la bofelo re tla lebagana le Motlhodi wa rona, gore re atlholelwe ka fa tsamaong ya rona mono mo lefatsheng. Ka moo a re ipotsiseng re re: Re amogelana jang le batho ba bangwe? A re gopoleng gore re tshwanetse go ba rata mongwe le mongwe, jaaka re ithata, jaaka Morena Jesu a re rata! Ke nnete go huma ga go leswafatsa lutho, fa khumo e sa direlwe e kete ke modimo, gonne ga re ka ke re direla Modimo le mamone. Ke tshwanelo go abelana le bahumanegi ka tse re di abetsweng ke Modimo, gonne ga re nke re tsamaya le sepe sa lefatshe ka letsatsi la bofelo. Kana tumelo e e pholosang ka go dumela mo go Keresete ke se se tlhokegang, se feta tsotlhe. Tsa lefatshe di tla tlogelwa tsotlhe, di sale mo lefatsheng. Ka moo ga go tlhokege gore re di direle, le fa e le ka mogopolwana. A re se ka ra itsietsa ka go gopola gore re ka ipaakanyetsa botshelo jo bo sa khutleng ka tsa khumo. Nyaya, ga go a nna jalo. Jesu Keresete ke khumo e kgolo ya rona. Ga a ka a re reka ka gouta, gongwe ka selefera, mme e le ka madi a a boitshepo a gagwe a a sa phadisanngweng le sepe. Ke ene yo o dirileng gore re letlane le Modimo, re nne le botshelo jo bo sa khutleng ka go itshwarelwa, ka go balelwa tshiamo ya ga Keresete ka go dumela mo go ene. Modimo o re rata rotlhe, le fa e le re le bahumi, le fa re le bahumanegi, re amogelesega rotlhe fa pele ga ona ka go dumela mo go Jesu Keresete ka fa go kwadilweng ka teng mo go Joh. 3:16-18. Jesu ka esi a itshupa, a re: "Ke nna tsela, le boammaaruri, le botshelo, ga go ope yo o tlang go Rre, fa e se ka nna," Joh. 14:6. Bakaulengwe, ga go na tsela epe e sele e re ka gorogang ka yona mo go Rara wa rona yo o mo legodimong, fa e se ka go dumela mo go Keresete. A re rereng, re phatlhalatse Efangele e mo mafatsheng otlhe. Ga go thuse gore re gopole gore re tla bolelelwa ke ba ba sa tlholeng ba le teng ka tse ba di bonyeng kwa ba ileng teng. Re rerelwa lefoko la Modimo ka metlha, a re utlweng, re tlabologe, re dumele. Foo ke tshwanelo gore re ele tlhoko go itisa, re se tsiediwe ka ditimetso. A re gopoleng gore tseo ga re ka ke ra di dira, le e seng go di tlhaloganya ka thata ya rona, mme ke Mowa o o Boitshepo o o re gogelang, le go re goga mo boammaaruring, bogolo mo tumelong e e pholosang ka go dumela mo go Jesu Keresete, Morwa Modimo, Mopholosi wa rona. A re

lebogeng Rara yo o mo legodimong, yo o re fileng nako gape, le go re laletsa ka metlha gore re reetse lefoko, re le ikokobeletse gore re abelwe boitshwarelo jwa maleo le botshelo jo bo sa khutleng ka Morwawe Jesu Keresete. Amen.

9. Thapelo: Modimo, o re utlwele botlhoko, o re itshwarele maleo a rona. O re abele gore re dumele mo go wena, le fa re ka kopana le eng mo botshelong jwa rona. Morena, o re gopotse ka letsatsi le letsatsi, fa re kolobeditswe gore Atame yo o mogologolo a se ka a tsoga, mme a nwediswe, a swe ka boikwatlhao le tlabologo, gore go tsoge motho yo mošwa ka metlha,, a tshole fa pele ga gago ka boitsheko, le ka boammaaruri. Re kopa jalo ka ntlha ya ga Jesu Keresete. Amen. Thapelo ya Morena: Rara wa rona yo o mo legodimong ...

10. Sefela sa 301 - 276/283

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke S. E. Sithole , ka ngwaga wa 2015

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.